

1 Jon

Okoro buk nukan onoktapau

Jisas ko meienuk, woisan 85 senek manonuk, Jon ko Anut nukan roasiret Esia provins opok jer we marowon. Jon ko koiam sarewon. Ko ak Anut pak kon mokoi, Jisas pak woiaka karar me rawaun rai jer we marowon. Karauk sät ämän miäi roat akas keser awariäi, 'Jisas Krai ko ika ro senek pewon, okon, ko Anut nukan mokoi wa. Kesermoi, ko ätäi wa kowai. Akan ronkat osap sosop äpu maun kiro näwäu, utianik, akan woiaka karauk roat mesin meieäi kiro omnok-oupaian onok, okon, näwäu wa.

Jon nukas Kristen roasiret ak kiro ämän wa rowau rai awarowon. Kos keser awarowon, 'Ik Anut mesin woiokos meieanik, karauk roasiret akanun nais woiokos meiäu.'

Okoro buk tainoraun ämän

- 1:1-4 Jon nukas awau rawaun ämän jer wewon.
- 1:5-2:17 Sanpewan onok pak pututuwon onok pak ak tururau senek wa.
- 2:18-29 Jon nukas Krai nukan iwäi jaukut mesin roasiret awarowon.
- 3:1-4:6 Ik roasiret akan onok aparianik, ak Anut nukan mokoit ra, Satan nukan mokoit rä, ik äpu maun itok.
- 4:7-5:5 Anut nukas roasiret mesin wous meiäu onok nukan onoktapau, okon, ik nais karauk roasiret mesin iken woiokos meieta rai, karauk roasiret akas ik kon roasiret senes äpu mukaiei.

5:6-21 Jon nukas roasiret owo osap mesin akan woiaka epar maiei rai awarowon. Kos ak owon akan woiaka epar maiei rai awarowon. Ak owo onok tainoraiei rai awarowon. Keser awarianik, kon ämän patarwon.

Awau orip orip rawaun ämän.

¹ O jaiat, Jisas ko awau orip orip rawaun ämän. Ko meter okoro omnokou päu wa opok rawon. Kos koianik, ämän arewon ik roumun. Epar senes, ko iken amiokosar aparianik, iken ipiokos nais atomun mesin ak rusapai jer we marom. ² Kiro awau orip orip rawaun ämän amop sarenu, ik aparmun. Keseria, ik epar ämän mianik, kiro awau orip orip rawaun sakau mesin ak jer we marom. Meter ko momok pak rawon, rusapai amop penuk, aparmun. ³ Ik ko aparmoi, kon ämän roumun, ikes kiro ämän ran ak mareäumun. Keserta, akas pak akan woiaka ik pak karar mona, ik erek tururia, iken woiok karar momonok pak kon mokoi Jisas Krais pak rawaun itok. ⁴ Ik iken woiok näwäu ereraun kiro ämän jer we marom.

Ik arou pakas ariäu.

⁵ Ik kiro ämän Anut nukan mokoi nukan oksau pakan roumun awaraurum. Kon ämän kesek: Anut nuka ko arou senes, kar pututu ko opok rawau wa. ⁶ Utianik, ikes Anut pak woiok karar rau äianik rai, onok aru mesin ronkateanik, ik pututu ariäum, kiro ik sät ämän mianik, epar ämän wa tainoriäum. ⁷ Utianik, nuka arou opok rau senek ik nais arou opok arieta rai, kiro iken jaunokot pak woiaka karar me raiäum. Anut

nukan mokoi Jisas nukan karianas iken onok aru miäumun erekapu jækäi mukonuk, ik Anut nukan amukup eposek sare raum. ⁸ Utianik, ik onok aru wa miäum äieta rai, epar ämän kiro iken woiok uru rawau wa, kiro iken woiok sätäurum. ⁹ Utianik, iken onok aru miäumun mesin Anut aurta rai, kos kon onok tuku pakas ik paip mukowon tainorianik, iken onok aru miäumun jækäi mukomara, nukan amuk opok eposek sare mukai. ¹⁰ Meter Anut nukas äiewon, “Roasiret ak erekapu onok aru orip.” Keseria, ik onok aru wa miäum rai äieta, ikes Anut ko sätäiäu ro auriäum. Keserta, rai kon ämän iken woiok uru rawau wa.

2

Krais ko iken sareikowon ro.

¹ O jaiat, ak woiaka epar moin roasiret, is akanun woias meiem, ak isan mokoit senek, is ak onok aru wa mau rai, okoro jer we marom. Utianik, inok roasir ko onok aru monuk rai, Jisas Krais ko onok eposek miäu kos kiro ro saräun momonok auriäu. ² Nukas iken onok aru jækäi mukaun kon enipsau Anut nuruwon. Ko ik Juda roasiret karar sareikaun keserau wa, roasiret erekapu okoro omnokou opok rai erek akan onok aru jækäi maraun keserwon. ³ Ik Anut nukan sintore ämän tainorta rai, ik ko epar äpu mom. ⁴ Utianik, kar ros “Is Anut äpu” äiemara, Anut nukan ämän tainorau wa, kiro ro ko ämän sätäiäu. Anut nukan epar ämän kon wou uru rawau wa. ⁵ Utianik, kar ro ko Anut nukan ämän tainoriäu, kiro ro ko epar Anut mesin wous meieäu, karauk roasiret ätär mareäu. Kiro onok pakas ik äpu ik

Anut pak pasar raum. ⁶ Inok roasir “Is Anut pak pasar raim” äiäi, kiro roasir ko Kraiss nuka keser ariäu senek ariaura.

⁷ O jaiat, is akanun woias meiem, is okoro sintore ämän rusapai jer we marom, kiro awau ämän wa, kiro meten ämän. Kiro ämän ak meter meter roiän. ⁸⁻⁹ Utianik, is rusapai okoro sintore ämän jer we marom kiro awau senek. Jisas Kraiss nukas iken woiook uru sarau miäu, okon, ik ko senek, iken jaunokot mesin woiokos meieäum. Keseria, iken woiook uru pututu manonuk, arou senes pemara, jere rau. Keseria, ik epar äpu kiro sintore ämän epar senes. Inok roasir kos “Is arou opok raim” äiemara, kon jauk sauk muriäu, kiro roasir ko pututu pakar rau. ¹⁰ Inok roasir kon jauk mesin wous meieäu, ko arou opok raiäu, kon wou uru kar osapus ko onok aru maun rawau wa. ¹¹ Utianik, inok roasir kon jauk sauk muriäu, ko pututu raiäu. Ko pututu raumara, amuk putut karieson apu aparau senek wa. Keseria, ko pututu raianik, apu manaun itaneäu.

¹² O isan mokoit, ak Jisas mesin woiaaka epar mona, akan onok aru miäi kiro Anut nukas jækäi marowon, okon, is ak jer we marom. ¹³ O moniat, kiro ro meter meter rawon, rusapai ran rau ak äpu, okon, is ak jer we marom. O mokoit tenemai, akas Satan itimorin, okon, is ak jer we marom. O mokoit, ak momonek epar äpu moin, okon, is ak jer we marom. ¹⁴ Moniat, kiro ro meter meter rawon, rusapai ran rau ak äpu, okon, is ak jer we marom. Mokoit tenemai, ak sakau orip Anut nukan ämän akan woiaaka uru rau, akas Satan itimori, okon, is ak jer we marom.

Omnokou pakan osap mesin woiakas wa meiewe.

¹⁵ Ak okoro omnokou pak okoro omnokou pakan osap mesin woiakas wa meiewe. Utianik, inok roasir ko okoro omnokou pakan osap mesin wous meienuk, ko momonek omar oik rau mesin wous meieäu wa. ¹⁶ Omnokou pakan onok erekapu okoro omnokou opok rau, kiro kesek: ro asik apareanik meswareäu, ro osap atap atap apwareanik wous weäu, ro osap sosop orip kon enip kãmioik jou miäu. Kiro onok erekapu Anut pakas kowau wa. Kiro onok erekapu omnokou pakan. ¹⁷ Omnokou pak kon enmaksau nepipiraun onok pak, kiro erekapu wasaräieir, utianik, inok roasir Anut nukan ämän tainorai, ko orip orip awau rawai.

Krais nukan iwäi jaukut.

¹⁸ O isan mokoit, is akanun woias meiem, omre wasaräun ses siakup pe rau, ak meter Krais nukan iwäi jauk päi rai äiein roin. Rusapai, kon iwäi jaukut sosop epar pe rai. Keseria, ik äpu mau, omre wasaräun ses siarakap pe rau. ¹⁹ Kiro roat ak meter ik pak rain ak iken jaunokot wa, ak Jisas iwäi maun kiro onokun ik utoiki manoin. Utianik, ak iken jaunokot maro, ak ik pak rawoi. Ak ik utoiki manoin, okon, kiro amop senes ak iken jaunokot wa.

²⁰ Utianik, ak Krais nukas kon Osou Näu ak opok kourwon. Keseria ak erekapu epar ämän äpu. ²¹ Is ak kiro epar ämän äpu wa rai jer we marau wa. Ak epar ämän äpu miäi. Ak epar ämän pakas kar sät ämän wa peäu äpu moi. Kiro

onokun is ak jer we marom. ²² Sät äiäu ro inok? Kiro sät äiäu ros Jisas ko Kraiss, kiro ro Anut nukas ik imäikaun äsimorau wa rai äiäu. Kiro ro ko Jisas nukan iwäi jauk. Ko Mokoï kon Momok ori mesin sumkäinewatiäu. ²³ Inok ro ko Mokoï sumkäinäi, Momok nais sumkäinai. Inok ro ko Mokoï mesin kon wou epar miäu, Momok mesin ran wou epar miäu.

²⁴ Kiro ämän meter roin akan woiaka uru sakau ate rawe. Ak kiro ämän akan woiakas sakau ate rawaiei, kiro ak Mokoï Momok ori pak pasar rawaiei. ²⁵ Kiro kesek, Jisas nukasar ik awau orip orip rawaun paip mukowon.

²⁶ Is karauk roat akas ak sät awareäi mesin jer we marom. Ak onok aru maun awareäi.

²⁷ Utianik, ak, Kraiss nukas kon Osou Näu ak opok kourwon. Kiro Osou Näu ak opok rau, okon, kar ros ak kar ämän tamarau senek wa. Kon Osou Näus ak onok erekapu tamareäu. Kon ämän kiro epar senes, sät ämän wa. Keseria, ak kiro tainorna, Kraiss pak pasar rawaiei.

Ik Anut nukan mokoit.

²⁸ O isan mokoit, is akanun woias meiem, ak ko pak pasar rawe. Keseria, ko tawa kounuk, ik woiok erer orip ko kowai ses opok oiorok wa nai.

²⁹ Ak äpu Kraiss ko onok tuku miäu, okon, ak kiro onok äpu, inok ro ko onok tuku keseriäu, ko Anut nukan mokoï saräi.

3

¹ Momonek ko ikenun wous meieäu onok owo senek ronkatewe. Kon wous ik mesin epar senes meiewon, okon, ik kon mokoit aikowon. Kiro epar senes ik Anut nukan mokoit raum. Okoro

omnokou pakan roasiret ak Anut äpu wa, okon, ak ran ik kon mokoit sare mukowon ak äpu wa. ² O isan jaiat, is akanun woias meieäm, ik rusapai Anut nukan mokoit raum. Ik äpu wa, tawa ik owo senek rawam rä. Utianik, ik äpu, tawa Krai ätäi kounuk, ik ko rau senekurar aparianik, ik ko senek saräm. ³ Roasiret erekapu Krai ätäi kowaun kame raiäi, ak Anut nukan amukup eposek rawaiei. Krai ukun wäpik senek ak ran ukun wäpik rawaun sarau maiei.

⁴ Inok roasir onok aru miäu, ko Anut nukan sintore ämän wa tainoriäu. Owon, onok aru ko keseriäu kiro owo senek? Kiro ko sintore ämän wa tainoriäu. ⁵ Ak äpu Jisas Krai nukas akan onok aru miäi jäkäi maraun kowon. Ko kar onok aru mau wa. ⁶ Kar roasir ko Krai pak pasar raiäu ko orip orip onok aru wa miäu, utianik, kar roasir ko orip orip onok aru miäu ko Jisas äpu wa, ko Jisas aparau wa.

⁷ Isan mokoit, is akanun woias meiem, ak kar ro inikerna, kos ak onok aru maun rewaronuk, wa tainoraiei. Inok roasir ko onok tuku eposek miäu, ko Krai senek Anut nukan amukup tuku rawai. ⁸ Inok roasir ko onok aru orip orip miäu, ko Satan nukan. Satan ko Anut nukas omnokou ate mowon ses opok, onok aru miäwon, koi rusapai kir keseriäu, okon, onok aru miäu roasir ko Satan nukan. Kiro onokun, Anut nukan Mokois Satan nukan sarau erekapu aru muraun kowon. ⁹ Kar roasir ko Anut nukan Mokois senes ko orip orip onok aru wa miäu. Anut nukan onok erekapu ko opok rau. Anut kon momok, okon, ko orip orip onok aru wa miäu. ¹⁰ Ik äpu inok roasir

onok eposek wa miäü, ko kon jauk mesin wous wa meieäü, okon, kiro roasir ko Anut nukan mokoï wa. Kiro onok pakas ik Anut nukan mokoït ak atap apwariäüm, Satan nukan mokoït atap apwariäüm.

Ik jaunokot mesin woiokos meiäü.

¹¹ Ak okoro ämän meter awarona, roin kiro kesek: ik jaunokot mesin woiokos meiäü. ¹² Ak Kain senek wa saräü. Kain ko Satan nukas kon ronkat kamenuk, Abel, nukan amak senes nukasar wenuk, meiewon. Kain nukas nukan amak owo onokun wenuk, meiewon? Kiro onok nukasar keserwon kiro Anut nukan amukup aru senes, utianik, kon amakus Anut nukan amukup onok eposek keserwon, okon, ko amak wenuk, meiewon. ¹³ O isan amaiat, okoro omnokou pakan roasiret akas ak sauk marona, ak wa karkairau. ¹⁴ Ik iken jaunokot akanun woiokos meieäüm, okon, ik meiäün onok itimorianik, ik orip orip awau rawaun sakau orip. Inok roasir ko kon jaukun wous meiäü wa, kon totok meie rawai. ¹⁵ Inok roasir ko kon jauk sauk muriäü, ko roat akwaronuk, meiäi ro. Ak äpu inok ro ko karauk roat akwaronuk, meiäi, ko awau orip orip rawaun sakau wa owai.

¹⁶ Kraï nukas ik mesin am äpäp opok meiewon. Keseria, ik jaunokot akanun woiokos meiäün onok äpu miäüm, kiro, ik ran iken jaunokot sarwaraun iken enmoksau arau. ¹⁷ Kar ro ko osap wäpik raunuk, kar ro osap sosop oripas kiro ron wouti mianik, wa isanarnuk rai, owose ko “Is Anut mesin woias meieäim” äiäü? ¹⁸ O isan mokoït, is akanun woias meiem, iken jaunokot

akanun woiokos meieäum rai, oioksaus karar erar wa arau. Oioksaus area tainormoi, sarwarau. Kiro iken jaunokot iken woiokos ak mesin epar meieäum äpu maiei. ¹⁹⁻²⁰ Iken sarau pakas ak äpu maiei ik epar ämän tainoriäum. Keseria, iken woiok ik ämän orip äienuk rai, Anut nukan amuk opok woiok erer orip sakau tai rawam. Iken woiok uru ronkat eteinak, Anut ko näwäu, ko iken onok erekapu äpu.

²¹ O jaiat, is akanun woias meiem, iken woiokos ik ämän wäpik aikonuk rai, kiro ik Anut nukan amukup woiok erer orip tai raum. ²² Ik kon ämän tainorianik, kon wou ereraun sarau miäum, okon, ik owo osap mesin ko aurta, ikai. ²³ Kon sintore ämän kesek: 'kon mokoï Jisas Kraïs nukunun woiok epar momoi, jaunokot mesin woiokos meiäu,' kiro ko aikowon senek. ²⁴ Roasiret ak kon sintore ämän tainoriäi, ak ko pak pasar raiäi, kos ran ak pak pasar rau. Kon Osou Näu ikowon kos aikonuk, ik kiro onok pakas ko ik pak pasar rau äpu miäum.

4

Osou aru pak osou näu pak.

¹ O isan jaiat, is akanun woias meiem, karauk roat akas ik Osou Näu orip rai awarona, ak kurte akan ämän erekapu woiaka epar wa mau. Sätäiäi roat sosop ak okoro omnokou opok erekapu manoutoin. Keserna, akas amke ak ate apwaroinai, kiro osou ak opok rau Anut naka pakan ra, wa ra aparwe. ² Ak Anut nukan Osou kesek äpu maiei. Inok ros Jisas Kraïs ko ro senek okoro omnokou opok kowon äienuk rai, kiro ro

Anut nukan Osou Näu orip. ³ Utianik, inok ros Jisas Kraiss ko Anut pakas kowau wa äienuk rai, kiro ro osou aru orip. Kiro osou aru kiro ro opok rau, kiro Kraiss nukan iwäi jauk. Ak ko kowai äiein roin, epar ko okoro omnokou opok meter kowon rau.

⁴ Isan mokoit, is akanun woias meiem, ak Anut pakan, akas kiro sät ämän miäi roat itimwaroi, owon, kiro Osou Näus ak opok rau kiro roat akan osou itimwarowon. ⁵ Kiro sät ämän oi areain roat ak okoro omnokou pakan, okon, ak okoro omnokou pakan ämän are arina, okoro omnokou pakan roasiret akan ämän roumoi, tain-oriäi. ⁶ Utianik, ik Anut nukan roasiret. Inok roasir ko Anut äpu, kiro roasir iken ämän roiäi. Utianik, inok roasir ko Anut äpu wa, kiro roasir iken ämän wa roiäu. Keserna, kiro onok pakas ak epar ämän miäu Osou Näu pak sät ämän miäu osou aru pak äpu mataiei.

Anut ko ik mesin wous meieäu.

⁷ O isan jaiat, is akanun woias meiem, ik ika ika iken jaunokot mesin woiokos meieäu, owon, jaunokot akanun woiokos meieäum, kiro onok Anut pakas kowon. Inok roasir ko kon jaukut akanun wous meieäu, ko Anut nukan mokoi, kiro ro ko Anut äpu. ⁸ Anut nukas ik mesin wous meieäu, okon, inok roasir ko kon jauk mesin wous wa meieäu, ko Anut äpu wa. ⁹ Anut nukas kon wous ik mesin meiemara, kon mokoi karartapau okoro omnokou opok ik ko pakan awau orip orip rawaun sakau owaun äsimornuk, kowon. ¹⁰ Wous meieäun onok kesek, amke ikes Anut nukanun woiokos meieäu wa. Anut nukasar ikenun wous

meiemara, iken onok aru jākäi mukaun mesin kon mokoï äsimurowon, okon, ik Anut nukan amuk opok eposek rawam.

¹¹ O isan jaiat, is akanun woias meieäim, kiro onokun Anut nukas ikenun wous meieäwon. Kesernuk, ikes ran iken jaunokot mesin woiokos meiäü. ¹² Kar ros Anut wa apari rau, utianik, iken woiokos jaunokot akanun meieta rai, Anut ik pak rau, kon wous meieäü onok iken woiok uru eposek senes saräi.

¹³ Anut nukasar kon Osou Näu ikowon. Kiro onokun ik äpu ik ko pak raum, ko ik pak rau. ¹⁴ Momonokos kon mokoï okoro omnokou pakan roasiret akan onok aru pakan imwaraun äsimornuk, kowon. Iken amiokosar aparmun, okon, kiro ämän ak awarom. ¹⁵ Inok roasires Jisas ko Anut nukan mokoï räi äiäi, ko Anut pak rau, Anut ran kiro roasir pak rau. ¹⁶ Keseria, ik äpu Anut nukas kon wous ik mesin meiewon, okon, ik kiro mesin iken woiok epar mom.

Anut ko roasiret mesin wous meieäü onoktapau. Inok roasir karauk roasiret mesin wous meieäü, kiro roasir ko Anut pak raiäü, Anut ran ko pak raiäü. ¹⁷ Jaunokot mesin woiokos meiäün onok iken woiok uru eposek sare mukowon, okon, ik okoro omnokou opok Kraiss rawon senek raum. Keseria, tawa Anut nukas ik wasareikaun omre opok ik wa iminäü. ¹⁸ Inok roasir ko kon jaukun wous meiäi, ko wa imineäü. Anut nukan wous meiäün onok kar ro nukan wou uru sakau sarenu, kiro ro ko iminäü wa. Utianik, iken woiokos jaunokot mesin wa meieäüm Anut ik aru mukaun imine orip kame raum.

19 Amke Anut nukas ik mesin wous meieäü, okon, ikes ran karauk roasiret akanun iken woiokos meiäü. 20 Inok roasir kos “Isan woi Anut mesin meiem” äiemara, kon jauk sauk muriäü, kiro roasir ko sätäiäü. Kar ro ko jauk amukus aparianik, wous meieäü wa, ko Anut kon amukus wa apariäü, konun nais wous meiäü senek wa. 21 Kiro sintore ämän Krais nukas ikowon kesek: Inok roasiret akan woiakas Anut mesin meiäi, akan jaunakat akanun ran woiakas meiewe.

5

Ik okoro omnokou pakan sakau itimori raum.

1 Inok roasir Jisas ko Krais kiro ro Anut nukas ik imäikaun äsimornuk, kowon rai kon wou epar mianik, ko Anut nukan mokoï raiäü. Inok roasir momok mesin wous meieäü, kon mokoï mesin ran wous erek meieäü. 2 Iken woiokos Anut mesin meieanik, kon sintore ämän erekapu tainoriäüm. Kiro onokun ik äpu mam, ik Anut nukan mokoit mesin woiokos meieäüm. 3-4 Ik Anut nukan sintore ämän tainorta rai, kiro Anut mesin woiokos meieäüm. Roasiret erekapu ak Anut nukan mokoit asinakut raiäi, ak okoro omnokou pakan sakau erekapu itimoriäü, okon, kon sintore ämän tainoraun usu wa. Ik Anut nuka mesin iken woiok epar miäüm, okon, ik okoro omnokou pakan sakau erekapu itimori raum. 5 Inok ro okoro omnokou pakan sakau itimoraun itok? Kiro ro ko Jisas Anut nukan mokoï rai äiemara, kon wou epar miäü ko karar epar okoro omnokou pakan sakau itimoraun itok.

Anut nukas kon mokoi Jisas mesin amop äiewon.

⁶ Kiro Jisas Krais nukasar kiro onok pakas kowon. Ko anas an jomurin, rai rai, kon karian kourmara, meiewon. Ko an jowaun onok karar pakas kowau wa, ko karian kouraun onok pakas nais kowon. Osou Näu ko epar ämän nukan onoktapau, kosar Jisas nukan ämän amop miäu. ⁷ Osap 3 oripas Jisas nukan epar ämän ätär mukiäu. ⁸ Anut nukan Osou Näu, an, karian, kiro osap 3 oripas ämän karar äiäi. ⁹ Ik roat akan ämän arena, woiaka epar miäum, utianik, Anut nukan ämän areäu kiro sakau senes. Ko kon mokoi mesin epar ämän mowon. ¹⁰ Keseria, inok roasir ko Anut nukan mokoi mesin wou epar miäu kiro ämän kon wou uru raiäu. Utianik, inok roasir kon wou Anut mesin epar wa miäu, ko Anut sätäiäu rai äiäu, owon, ko Anut nukas kiro ämän kon mokoi mesin äiäu kon wou epar mau wa. ¹¹ Kiro epar ämän Anut nukas äiewon kesek: Anut nukas iken totomok awau orip orip rawaun sakau ikowon. Kiro totomok awau rawaun onoktapau kon mokoi Jisas opok rau. ¹² Inok roasir ko kon mokoi pak pasar raiäu, ko totok awau orip orip rawaun sakau oiäu. Inok roasir ko pak wa pasar raiäu ko kiro totok orip orip rawaun sakau wa oiäu.

Awau orip orip rawaun ämän.

¹³ Ak Anut nukan mokoi mesin woiaka epar miäi roasiret, akan totomaka awau orip orip rau äpu maun isas okoro jer we marom. ¹⁴ Ik Anut nukan ronkat karar tainoria, kar osap mesin aulam, ko roumara, ikai. Keseria, ik wa imineäum,

ik ko siakup poteäum. ¹⁵ Ik owo osap owaun mesin ko auram ko iken ämän auriäum roiäu, okon, ik äpu ikes owo osap ikaun auriäum kos ikiäu.

¹⁶ Kar ros kon jauk onok aru mowon apariäu, kiro onok arus kiro ron totok erekapu meiäun apu opok wa monuk rai, kos Anut aurnuk, Anut nukas awau orip orip rawaun sakau nurai. Is onok aru roasiret meiäun apu opok maraun mesin awarau wa. Kar onok arus meiäun apu opok kureikaun itok. Utianik, is kiro mesin Anut auraun rai awarau wa. ¹⁷ Onok erekapu eposek wa, Anut nukan amuk opok onok aru. Utianik, karauk onok aru roat akas keseriäi kiro akan totomaka erekapu wa meiäi. Keseria, kon jaukus onok aru monuk rai, ko Anut aurnuk, kos kon jauk isanarai.

¹⁸ Ik äpu Anut nukan mokoit akas onok aru ätäi ätäi wa miäi. Anut nukan Mokois ak jekur kamwaronuk, Satan nukas ak ätäi aru maraun senek wa. ¹⁹ Satan ko okoro omnokou pakan roasiret erekapu kamwareäu, sinuk, ik äpu ik Anut nukan mokoit. ²⁰ Ik äpu Anut nukan Mokoï okoro omnokou opok kowon kos ik ronkat eposek ikowon, okon, ik äpu Anut ko epar eitek. Ik epar eitek pak kon mokoï Jisas Kraïis pak pasar raum. Jisas Kraïis ko epar eitek, ko awau orip orip rawaun onoktapau. ²¹ Keseria, o isan mokoit, is akanun woias meiem, ak okoro omnokou pakan sät eitek wa jou marau.

Anut nukan Ämän Eposek
The New Testament in the Girawa Language of Papua
New Guinea
Nupela Testamen long tokples Girawa long Niugini

copyright © 1994 Wycliffe Bible Translators, Inc.

Language: Girawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 13 Jul 2024 from source files dated 31 Aug 2023

857654ed-60eb-5741-bcea-dd5397d3f069